

Uunga siunnersuut: Pisortanut akiitsut akilersinniarneqartarnerat, pinaveersaartinneqarnissaallu pillugit Inatsisartut inatsisaata allanngortinneqarnera pillugu Inatsisartut inatsisaat.

(Atuuffissaasa annertusitinneqarnerat, ilanngaatiginnissinnaatitaanerup annertusitinneqarnera, naatsorsuilluni akiliinissamut piffissaliussap allanngortinneqarnerata malitsigisaanik sunniutaasumik allanngortitsineq, akiligassiissutit aningaasartaasa minnerpaaffissaat, atsiornissamut piumasaqaatinut ilaatitsinnginnissamut piginnaatitsissut, akiligassiissutit annikitsut isumakkeerneqartarnerat)

(Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinnineq

Akiliisitsiniartarneq pillugu inatsisip nutarternera pillugu Inatsisartut inatsisissaattut siunnersuut Naalakkersuisut sinnerlugit matumuuna saqqummiuppara.

Siunnersuummi siunertaq pingarneq tassaavoq akiliisitsiniartarnitta nutarternissaa pisariillisinnissaalu. Siunnersuummi siunertaavoq akiitsunik akiliisitsiniartarnerup pitsanngortinnissaa, pisortanullu akiitsut amerleqqinnginnissaat.

Siullermik siunnersuutigineqarpoq inatsisip atuuffia nutarterneqassasoq. Tamassuma kinguneraa, Inatsisartut inatsisaat tamassumunnga tunngasut 2007-miillu allannguutit akuerineqarnikut inatsimmi maannakkut ilanngunneqarnerat. Taamatut nutarterinermi akiliisitsiniartarnermi inatsisit nutaanerpaat ilanngunneqarnissaa qulakkeerparput.

Pisortanut akiitsunik akiliisitsiniartarneq pinaveersaartinniarlugu, pinngitsaaliissummik akiliisitsiniartarnerup pitsanngorsarlugulu nukittorsarneqassasoq Naalakkersuisut kissaatigaat. Taamaalilluni akiitsut, kredsretinit ullumikkut akilersinniarneqartussat, akileraaruseriffimmit siunissami akilersinniarneqartassapput. Taamatut allannguinermi, aalajangersimasumillu iliuuseqartarnissamut akileraartarnermut ingerlatsivik, pitsaanerusunik kinguneqartussamik sakkussaqaalissaaq.

Akiliisinnaajunnaartoqarnera akiliisitsiniartarnerup annertusinera siunnersuummi aamma ilanngunneqarpoq, taamaalilluni akileraarutitut akilikkat amerlanerussutaasa saniatigut akilerneqartuni allani ilanngaasoqarsinnaalluni. Tamassumani pisortat eqaannerusumik ingerlatsilersinnaapput, akiitsullu assigiinngitsut iliuuseqarfiginissaanut periarfissinneqarlutik.

Aamma siunnersuutigineqarpoq pisassat annikitsut annikitsuaqqatut isigineqarsinnaasutut killigitinneqartut, ukiumoortumik aningaasanit inatsimmit inatsimmut aalajangersimasumut

nuunneqassasut. Taamatut inatsimmi toqqaannartumik inissinnerisigut patajaannerusumik paasiuminarnerusumillu sinaakkuteqarnissaq qulakkeerneqassaaq.

Kiisalu allakkiat ilaanni atsiornissamik piunasaqaat atorunnaarsillugu pisariillisaanissaq automatiserinissarlu kissaatigineqarpoq. Taamaaliornikkut akileraartarfimmi isumalluutit allanut atorneqarsinnaassapput, aammalu inatsisitigut isumannaatsuuneq ajoqusinngikkaluarlugu innuttaasunut ilitseruinerunissamik periarfissiissalluni.

Allannguutit taakku akiliisitsiniartarnerup pitsanngortinnissaanut ataatsimut tapersiissapput, inuiaqatigiinnullu iluaqutaasumik ingerlatsineq pisariinnerulissalluni.

Naggasiullugu tusarniaaffigisat tusarniaanermut akissuteqaataannut sukumiisunut qujarusuppugut. Naalakkersuisut taakku tusaalluarlugit aaqiissutissaasinnaasut ilanngussimagaat oqaatigissavarput.

Naggataatigut siunnersuut tassungalu nassuiaatit innersuussutigissavakka.

Taamatut oqaaseqarlunga siunnersuut Inatsisartunut suliassanngortippara.